

Item myne gnedige frawe hatte eyne in keygenwertigkeyt der prebistyne und irer thumfrawen und freuchin under irer eygen mol fischen laszen: bestalte der rath dor bey unde liz iren gnaden dy gefangen fische usz dem netze weder in das wasser schütten in irem  
5 eygenthum in keygenwortigkeyt myner gnedigen frawen und der iren.

Item der rath had dy marg der landtwerunge bynnen XX ader XXII jaren meher denne uber dy helffte geringert und genedriget, das myner gnedigen frawen iren thumfrawen und capittelshern an iren zcinsen gros merglicher schaden und abegang bisz her gewest ist.  
10 Do der rath vor XXVI jaren der von Plawen, eyner eptischynne, dy montze fünff jar abkoufften<sup>1</sup>, geretten und globitten sie fünff phennige vor eyn groschen zu slaen, uber das dritte jar slugen sie ir negen vor I groschen, dach haben sie sich keygen dem stift verschreiben, sy slügen die montze, wy geringe sie dy slügen, salde eyner eptischynne  
15 und dem stift an iren zcinsen unschedlich sin ane allen behelff. Uff dy zceyt müste eyner eyne zcinszmarg vergenügen myt eyn gulden und mit XI swertgroschen mynner III hel., ytezunt gibet her XXVI swertgr. und I katt. pf. vor I marg.

Item myne gnedige frawe liz dem alden ratte entpfelen den  
20 fleisch- und brothkauff nach iren eyden dem armütte zcu fromen recht bestellen saldten, das sie auch wegertten, und wolden dy innungen nicht irczornen, uff das sie von en wedter gekorn worden, und dy jhenigen, dy vorhen eyn gut uffsehn hetten und yn forchte hilden, der wollen sie nicht meher kysen, uff das sie frey backen und slachten  
25 mogen, wy sy wollen.

Item in der rathstoben wart eyn orley gehalten, so das etzliche im ratte uffstunden, nemelich Ludolphus Kirstianus und Meyer, und begonsten ir gemelich und sagitten, man salde stormen laszen, uff daz alle gemeyne usz beyden steten beyqwemen zcu fragene und zu  
30 besehen, wer by dem ratte adder by der frawen von Qweddeleborg bliben wolde, das etzliche mit noten irwertten.

Item dy statgeswornen haben nicht nach der stat gewonheyt und nach lute des statbuchs rechte burgermeister gekorn, eyner ist nicht funff jar bawer nach burger gewest, Ludolphus der ander hat nicht X  
35 jar in der stat gewonet, her had och weder erbe nach gut, husz hoff nach acker aldo zu Qweddelenborg, das alles weder statrecht ist, und haben andere redeliche cluge wissende menner, dy myner gnedigen frawen zugetane sind und lange zcyt den rath gehalden, dy haben sie usgeworffen, grobe ackerluthe untogliche und andere, dy yren gnaden  
40 und alle den iren abefellig sind, weder in dy kore gesaczt.

Item eyner us dem nawen ratte hatte offenberlichen gesaget, alle dy jhenigen, dy myner gnedigen frawen zu getane weren, iren gnaden beylegitten, sich zcu den iren hilden, solde keyner nymmer meher in den rath gekoren werden, das wirt also offenberlichin gehalden.

1) S. Urk. vom 30. April 1451, Nr. 402, S. 411.